

starogradski

OPĆINA STARI GRAD  
SARAJEVO



MUNICIPALITY OF STARI  
GRAD SARAJEVO

# haber

BESPLATAN PRIMJERAK • AVGUST, 2024, broj 61.

Općina Stari Grad  
Sarajevo



Općina Stari Grad  
Sarajevo

**Uz saradnju sa Vladom KS, FBiH  
i Gradom Sarajevom ugovoreno  
više od 20 miliona KM projekata u  
Starom Gradu**

- 5-11 Podrška i projekti
- 12-13 Općinsko vijeće
- 14-15 Intervju Seid Škaljić
- 20-21 Bašćaršijske noći
- 23 Sarajevo Film Festival



## Impressum

- Izdavač:** Općina Stari Grad Sarajevo
- Pripremili:** Alma Imamović  
Jasenka Jašarević  
Nedim Šahović  
Mirna Pecikoza
- DTP:** Safet Mališević
- Fotografije:** Haris Karamehmedović
- Štampa:** Grafika Šaran d.o.o.
- Tiraž:** 3000
- Adresa:** Zelenih beretki br. 4  
71000 Sarajevo
- web:** [www.starigrad.ba](http://www.starigrad.ba)
- e-mail:** [info@starigrad.ba](mailto:info@starigrad.ba)
- Telefon:** +387 33 282 491



## Projekti



Predstavnica UNDP-a Arnesa Borčak i načelnik Irfan Čengić

# Održivi razvoj i ulaganja u obrazovne institucije Starog Grada

**Projekti su fokusirani na uvođenje obnovljivih izvora energije u školske objekte, kao i na sveobuhvatnu modernizaciju infrastrukture ● Ova ulaganja imaju za cilj unapređenje energetske efikasnosti, smanjenje troškova i stvaranje boljih uslova za učenike i nastavnike**

Općina Stari Grad Sarajevo kontinuirano ulaže napore kako bi poboljšala infrastrukturne uslove obrazovnih institucija i promovisala održivi razvoj kroz projekte obnovljivih izvora energije i energetske efikasnost. U saradnji sa domaćim i međunarodnim partnerima, realizovani su brojni projekti koji ne samo da poboljšavaju uslove za rad i učenje, već također doprinose očuvanju okoliša i historijskih vrijednosti. Ovi projekti predstavljaju značajne investicije u budućnost zajednice i mladih generacija, te su ključni korak ka izgradnji održive i prosperitetne lokalne zajednice.

## Solarne elektrane na školama u Starom Gradu

Razvojni program Ujedinjenih nacija za razvoj (UNDP) u Bosni i Hercegovini provodi projekt "Zeleni ekonomski razvoj" koji primarno finansira Švedska. Kroz ovaj projekt, koji ima za cilj smanjenje energetske ovisnosti i promociju obnovljivih izvora energije, a na inicijativu Općine Stari Grad Sarajevo, planirana je instalacija fotonaponskih solarnih elektrana na objektima tri osnovne škole u Starom Gradu - OŠ "Mula Mustafa



Načelnik Čengić i gradonačelnica Karić, škola na Drveniji će dobiti novi sjaj

Bašeskija” - Područna škola Sedrenik, OŠ “Vrhbosna” na Faletićima i OŠ “Hamdija Kreševljaković” na Vratniku.

Načelnik Općine Stari Grad, Irfan Čengić 17.07.2024. godine je posjetio ove škole zajedno sa predstavnicom UNDP-a Arnesom Borčak, te su zvanično dogovorili saradnju.

«Ova tri značajna projekta su dio ulaganja u iznosu većem od 7 miliona KM u objekte za obrazovanje u općini Stari Grad Sarajevo, koje realizujemo sa raznim partnerima. Radi se na vrtićima, osnovnim i srednjim školama, kao i fakultetima u Starom Gradu. Posebno mi je drag ovaj projekt, jer ulaganje u obnovljive izvore i energetska efikasnost je investicija za budućnost i naš strateški cilj», naglasio je načelnik Čengić.

Projekt će trajati do kraja ove godine, a zajednički ga finansiraju Općina Stari Grad i UNDP.

Na ranijim sastancima, riješen je i dug od 50.000 KM prema UNDP-u koji je ostao iz prethodnih godina, zbog kojeg su zaustavljeni zajednički projekti. Uz želju Općine Stari Grad da se pozicionira kao vodeća jedinica lokalne samouprave nastaviti će se raditi na projektima obnovljivih izvora energije (OIE) i energetske efikasnosti.

### Sanirana dječija igrališta na Mošćanici i Boguševcu

Općina Stari Grad u saradnji sa KJKP „Park“ realizovala je projekat sanacije dječijih igrališta kod OŠ „Vrhbosna“ i u ulici Boguševac. Nastavak je ovo brojnih aktivnosti općinske administracije i općinskog načelnika Irfana Čengića, a koji za cilj imaju poboljšanje stanja u kojem se nalaze dječija igrališta i sportski tereni. „Nažalost dječija igrališta često su na meti vandala. Ipak i pored tih negativnih pojava nastojimo na sve moguće načine djeci i njihovim roditeljima omogućiti da na lijep način provode svoje slobodno vrijeme na otvorenom“, poručio je načelnik Čengić. Podsjećamo, u administrativnoj pripremi je početak sanacije sportskih igrališta kod osnovnih



škola „Hamdija Kreševljaković“ i „Vrhbosna“.

## Još jedan milionski projekat u Starom Gradu

Načelnik Općine Stari Grad Sarajevo Irfan Čengić potpisao je 01.07.2024. godine Ugovor o izvođenju radova na sanaciji fasade i zamjeni vanjske stolarije na JU Srednja škola poljoprivrede, prehrane, veterine i uslužnih djelatnosti

Sarajevo, zajedno sa gradonačelnicom Benjaminom Karić, ministricom Naidom Hota-Muminović i izvođačima radova NEIMARI d.o.o. Sarajevo. Ukupna vrijednost ugovora je oko dva miliona KM.

“Ove godine u školske objekte na području naše općine se ulaže oko 7 miliona KM. Pored obrazovnog procesa ovaj objekat će mnogo značiti za lijepu sliku Sarajeva. Kada se ovdje izvrši rekonstrukcija saobraćajnice, trotoara i tramvajskih šina, i uz renoviranu zgradu, ovaj

## Projekti

dio našeg grada će mnogo ljepše izgledati”, naglasio je načelnik Čengić.

Osim važnosti poboljšanja uslova za odvijanje obrazovnog procesa i energetske efikasnosti, obnova ove zgrade ima i estetski značaj jer se radi o prelijepom nacionalnom spomeniku BiH. Ranije je potpisan i Sporazum o zajedničkoj saradnji na ovom projektu.

## Nova ulaganja u starogradske škole

Općina Stari Grad Sarajevo nastavlja sa značajnim ulaganjima u obnovu i modernizaciju obrazovnih institucija, kroz potpisivanje sporazuma o dodjeli finansijskih sredstava za građevinske radove na OŠ „Saburina“ i Prvoj bošnjačkoj gimnaziji. Sporazume je 01.08.2024. godine potpisao načelnik Irfan Čengić, čime je osiguran nastavak projekata koji imaju za cilj poboljšanje infrastrukture i uslova rada u ovim školama.

Za OŠ „Saburina“ predviđena je rekonstrukcija sportskog igrališta, u iznosu od 50.000 KM, čime će se osigurati kvalitetniji uvjeti za tjelesnu i zdravstvenu kulturu učenika. Ovo igralište nije samo sportski prostor, već i mjesto okupljanja i zajedništva, koje će nakon obnove pružiti sigurnije i ugodnije uslove za aktivnosti na otvorenom. Ovaj projekt je dio šireg plana Općine da kroz modernizaciju školskih objekata poboljša kvalitet života učenika, ali i doprinese razvoju zdravih navika među mladima.

Prva bošnjačka gimnazija će zahvaljujući sporazumu dobiti sredstva u iznosu od 25.000 KM za sanaciju školskog krova. Ovaj projekt je izuzetno važan za očuvanje infrastrukture škole i osiguranje sigurnih uvjeta za rad i učenje. Direktorica Prve bošnjačke gimnazije Emela Mehmedspahić izrazila je zadovoljstvo zbog partnerstva sa Općinom Stari Grad, naglašavajući važnost kontinuiranih ulaganja u obrazovanje kao ključnog faktora za budućnost mladih generacija.

Načelnik Čengić je nakon potpisivanja sporazuma naglasio da ulaganje u obrazovne institucije nije samo trošak, već investicija u budućnost zajednice. Zahvaljujući ovim inicijativama, učenici i nastavno osoblje će imati kvalitetnije uslove za rad, što će dugoročno doprinijeti razvoju i napretku cijele lokalne zajednice.



*Rekonstrukcija sportskog igrališta OŠ „Saburina“*



*Termoizolacija zidova, stropova i krovova, zamjenu stolarije na Ekonomskom fakultetu*

## Unapređenje energetske efikasnosti na Ekonomskom fakultetu

Potpisan je ugovor o izvođenju radova na implementaciji mjera energetske efikasnosti na Ekonomskom fakultetu Univerziteta u Sarajevu. Ugovor su 15.07.2024. godine potpisali dekanica fakulteta, Meliha Bašić, te izvođač radova Unigradnja DD i direktor Mustafa Duraković. Ceremoniji potpisivanja prisustvovali su načelnik Općine Stari Grad, Irfan Čengić, pomoćnik ministricе za nauku, visoko obrazovanje i mlade Kantona Sarajevo, Nihad Šeta, guvernerka Centralne banke BiH, Jasmina Selimović, voditeljica pro-

jekta Ekonomskog fakulteta, Jasmina Mangafić, te prodekanica za naučno-istraživački rad, Amila Pilav-Velić. Dekanica Bašić je izrazila zahvalnost načelniku Čengiću na dolasku i kontinuiranoj podršci, ističući njegovo dugogodišnje opredjeljenje ka zelenoj ekonomiji. Ovaj projekt, podržan sredstvima Vlade Kantona Sarajevo i Federalnog ministarstva prostornog uređenja, značajno će unaprijediti energetska održivost Fakulteta i smanjiti potrošnju energije.

Planirani radovi uključuju termoizolaciju vanjskih zidova, stropova i krovova, zamjenu vanjske stolarije, ugradnju termostatskih ventila i zamjenu sijalica. Također, dio zgrade iz 1889. godine bit će restauriran, uključujući vanjske zidove i stolariju. Ove mjere će značajno poboljšati uslove za više od 3.000 korisnika ovog objekta, uključujući zaposlenike i studente.

# Podrška za socijalno ugrožene: Sanacija stambenih jedinica

**Ovaj sporazum omogućava sanaciju stambenih jedinica za socijalno ugrožene kategorije, osiguravajući dostojanstvene životne uslove za najugroženije građane Starog Grada.**



*Načelnik Čengić i ministrica Pavić-Pečenković upriličili su prijem za korisnike sredstava*

**O**pćina Stari Grad Sarajevo i Ministarstvo za rad, socijalnu politiku, raseljena lica i izbjeglice Kantona Sarajevo udružili su snage kako bi pružili pomoć najugroženijim građanima. Osigurana su sredstva za poboljšanje životnih uslova onih kojima je pomoć najpotrebnija, doprinoseći njihovoj socijalnoj inkluziji i dostojanstvenom životu.



*Sufinansiranje sanacije stambenih jedinica*

adekvatne uslove stanovanja, već i doprinijeti socijalnoj inkluziji te smanjenju socijalne nejednakosti u zajednici.

Načelnik Čengić naglasio je važnost ovog projekta u okviru šire strategije borbe za socijalnu pravdu i podršku najugroženijim članovima društva. "Ovo je samo jedan od koraka u našoj kontinuiranoj borbi za socijalnu pravdu. Zajedničkim naporima sa kantonalnim vlastima radimo na rješavanju stambenih problema i poboljšanju životnih uslova najugroženijih kategorija stanovništva u Starom Gradu," izjavio je Čengić. Ministrica Pavić Pečenković dodala je da je ovaj sporazum primjer dobre saradnje između lokalne i kantonalne vlasti, koja ima za cilj poboljšanje životnih uslova za sve građane.

## Sporazum o sufinansiranju sanacije stambenih jedinica

Načelnik Općine Stari Grad Sarajevo, Irfan Čengić, i ministrica za rad, socijalnu politiku, raseljena lica i izbjeglice Kantona Sarajevo, Enda Pavić Pečenković, potpisali su sporazum koji predviđa sufinansiranje sanacije stambenih jedinica za socijalno ugrožene građane. Ovim sporazumom osigurana su sredstva za poboljšanje stambenih uslova onima kojima je pomoć najpotrebnija. Projekat ima za cilj ne samo obezbijediti

Općina Stari Grad Sarajevo izdvojila značajna sredstva za pomoć najugroženijima



Od početka ove godine, Općina Stari Grad Sarajevo je kroz različite programe pružila značajnu podršku socijalno ugroženim građanima. Prema najnovijim podacima iz Službe za boračko-invalidsku zaštitu i socijalna pitanja, iz budžeta Općine za jednokratne pomoći izdvojeno je milion konvertibilnih maraka.

U periodu od 1. januara do 15. jula 2024. godine, evidentirano je da je ukupno 387 osoba ostvarilo jednokratnu novčanu pomoć kao socijalnu podršku, čime je ukupno isplaćeno 245.300 KM. Dodatno, 91 osoba je dobila finansijsku podršku za pokriće troškova liječenja u Bosni i Hercegovini u iznosu od 89.400 KM.

Specifične grupe, kao što su oboljeli od Celijakije, sufinansirani su sa 11.900 KM, dok je 248 osoba dobilo pomoć za ogrjev u iznosu od 168.640 KM. Također, tri paraplegičara, ratna vojna invalida su dobila novčanu naknadu u visini od 7.200 KM.

Podrška porodicama šehida i poginulih boraca, kao i demobilisanim borcima, iznosila je 20.000 KM, dok je za djecu s hroničnim oboljenjima i poteškoćama u razvoju, nakon tragičnog gubitka jednog djeteta, pruženo 85.050 KM podrške.

Dodatno, dva bračna para sufinansirana su za medicinski potpomognutu oplodnju u iznosu od 3.000 KM, a 145 porodilja je dobilo jednokratnu novčanu naknadu u visini od 80.000 KM.

Također, izdvojeno je 292.050 KM za stipendiranje djece boračke populacije, njih 190.

Ova značajna sredstva i pomoć od strane Općine Stari Grad Sarajevo igraju ključnu ulogu u poboljšanju kvaliteta života najugroženijih građana, ističući predanost lokalne zajednice prema socijalno osjetljivim grupama.

## Podrška

# Pomoć za sanaciju objekata socijalno ugroženih u Starom Gradu

Nakon potpisivanja sporazuma, načelnik Općine Stari Grad Sarajevo Irfan Čengić i ministrica Enda Pavić Pečenković upriličili su prijem za korisnike sredstava, gdje su potpisani ugovori o dodjeli pomoći za sanaciju stambenih jedinica. Ukupno 103 porodice iz Starog Grada ostvarile su pravo na pomoć, a sredstva su dodijeljena na osnovu rang liste koja je sačinjena prema kriterijima javnog poziva objavljenog u aprilu 2024. godine.

Ovaj projekt je poseban jer je omogućio transparentan i pravedan proces dodjele sredstava, što je omogućilo mnogim porodicama da dobiju prijeko potrebnu pomoć. "Ukinuli smo 'kraljevske ovlasti' načelnika da daje novac kome želi bez kriterija i javnog poziva. Usvojili smo propise, utvrdili kriterije i proceduru kako ćemo pomoći u sanaciji stambenih jedinica socijalno ugroženih porodica", istakao je načelnik Čengić, naglašavajući važnost transparentnosti i pravednosti u ovom procesu.



Pravo na pomoć ostvarile su 103 porodice iz Starog Grada

Ministrica Pavić Pečenković je izrazila zadovoljstvo što je projektom obuhvaćen veliki broj porodica, te je istakla da je ovaj uspjeh rezultat zajedničkog napora kantonalnih i lokalnih vlasti. "Sretna sam što

smo uspjeli osigurati pomoć za 103 porodice u općini Stari Grad Sarajevo. Ova sredstva će omogućiti sanaciju stambenih jedinica i poboljšanje životnih uslova socijalno ugroženim kategorijama. Projekat je rezultat zajedničkog napora kantonalnih i lokalnih vlasti i zato ćemo se uvijek truditi podržavati naše sugrađane i raditi na poboljšanju kvalitete života u našoj zajednici," zaključila je ministrica Pavić Pečenković.

# Predstavljen projekat za kasarnu "Mustafa Hajrulahović Talijan"

**Gradi se Muzej ARBiH i sportsko rekreacijski sadržaj • Odlukom Vlade Federacije kasarna data na privremeno korištenje Udruženju boraca "Bosnae – Zelene beretke" • Projekti vrijedni 10 miliona KM**

U Općini Stari Grad Sarajevo je 20.06.2024. godine održana prezentacija projekta revitalizacije lokaliteta Kasarne "Mustafa Hajrulahović Talijan" na Zmajevcu. Projekat su prezentovali predstavnici Arhitektonskog fakulteta Univerziteta u Sarajevu, koji su isti predložili Općini Stari Grad prepoznajući potencijal ovog lokaliteta, ali i njegov značaj za građane.

Ovim projektom obuhvaćena je sanacija objekta kasarne u svrhu uspostave muzeja Armije Republike BiH unutar postojećeg objekta, ali i vanjsko uređenje lokaliteta sa uspostavljanjem šetnice, sportskih terena i sadržaja za djecu, sport i rekreaciju. Implementira se zahvaljujući podršci Ministarstva za boračka pitanja Kantona Sarajevo na čelu sa ministrom Omerom Osmanovićem, koji je prisustvovao današnjoj prezentaciji.

Ranije je Odlukom Vlade Federacije kasarna data na privremeno korištenje Udruženju boraca "Bosnae – Zelene beretke", čiji su predstavnici također bili

## Projekti vrijedni 10 miliona KM

"Uz sve otpore koje imamo od destruktivnih snaga, mi ćemo ovu kasarnu konačno staviti u korisnu upotrebu. Napraviti ćemo Muzej Armije Republike BiH i sportsko-rekreacijski centar na 45.000 m<sup>2</sup>. Ovaj lokalitet je dio strateških prioriteta iz Strategije razvoja Općine, da na potezu ove kasarne, kasarne Pašino brdo i izletišta Barice napravimo sportsko-rekreacijski sadržaj. U tom pojasu spremamo i započeli smo projekte vrijednosti više od 10 miliona KM, a to su ova kasarna, stadion sa drugim sadržajima i izgradnja nove ceste za Barice," naglasio je načelnik Irfan Čengić.

prisutni na današnjoj prezentaciji. Posebno je istaknuto da se ni na koji način neće narušiti njihova prava, kada je riječ o upravljanju i raspolaganju kasarnom. U februaru ove godine, Vlada Federacije BiH



Brojni budući sadržaji

donijela je Odluku kojom se daje saglasnost za tekuće održavanje Kasarne "Mustafa Hajrulahović Talijan" Općini Stari Grad.

Nedavna Proljetna akcija čišćenja Ministarstva komunalne privrede, infrastrukture, prostornog uređenja, građenja i zaštite okoliša u Starom Gradu započela je u čišćenju ove kasarne na Zmajevcu, što je ujedno bila pripremna faza za implementaciju ovog projekta.

# Aktuelni projekti u Općini Stari Grad Sarajevo

**Nastavak inicijativa za podizanje životnog standarda kroz komunalne projekte • Općina Stari Grad Sarajevo posvećena je izgradnji bolje budućnosti**

Općina Stari Grad Sarajevo i dalje radi na unapređenju infrastrukture i komunalnih usluga kako bi poboljšala životni standard svojih građana. Kroz usko saradivanje s relevantnim institucijama i temeljito planiranje, ovi projekti se realiziraju, pružajući stvarne koristi i unapređujući kvalitet života u Starom Gradu.

## Muzej "Mersada Berbera"

U Starom Gradu u toku je izgradnja Muzeja "Mersada Berbera", ideje pokrenute 2019. godine. Načelnik Čengić potpisao je ključni Sporazum o sufinansiranju projekta rekonstrukcije poslovnih prostora u ulici Zelenih beretki, s ciljem uspostavljanja "Galerije Berber". Vrijednost projekta je skoro 1,5 miliona KM, s Ministarstvom kulture i sporta KS koje je izdvojilo 300.000 KM za prvu fazu.

## Općina i Grad Sarajevo obnovili i svečano otvorili igralište kod MZ Medrese

Zahvaljujući odličnoj saradnji Općine Stari Grad i Gradske uprave Grada Sarajeva najmlađi stanovnici ulice Safvet-bega Bašagića, ali i svi posjetitelji ovog poznatog lokaliteta u blizini prostorija Mjesne zajednice Medrese, imat će vrhunsko mjesto za igru i razonodu. Projekat potpune rekonstrukcije ovog igrališta u vrijednosti od 150.000 KM zajedno su realizovali Općina i Grad. Na svečanosti otvaranja, općinski načelnik Irfan Čengić pohvalio je saradnju i zahvalio se Gradskoj upravi, na čelu sa gradonačelnicom Karić.

„Ovo je jedno od prvih obećanja koje smo dali na početku mandata. Iako nas



*Ministar Magoda i načelnik Čengić: Odlična saradnja za Muzej „Mersad Berber“*



*Investicija vrijedna 150.000 KM*

je dočekao potpuni haos na sportskim igralištima u Starom Gradu, uspjeli smo zajedno sa KJKP 'Park' rekonstruisati nekoliko igrališta, te dati finansijska sredstva osnovnim školama 'Saburina' i 'Hamdija Kresevljaković' da u potpunosti obnove svoja školska igrališta. Inicijativa za realizaciju ovog značajnog projekta potekla je od općinskog i gradskog vijećnika Vedada Deljkovića. Općina Stari Grad i Grad Sarajevo za ovu priliku pripremili su poseban zabavno-sportski program uz prisustvo velikog broja mališana.

## Obnova OŠ „Edhem Mulabdić“

Trenutno su u toku radovi na projektu "Energetska efikasnost" u Osnovnoj školi "Edhem Mulabdić", koji se realizuje u partnerstvu Općine Stari Grad Sarajevo i Ministarstva za odgoj i obrazovanje Kantona Sarajevo. U prvoj fazi projekta, u školi je ugrađeno oko 90 novih prozora, izvršeno je utopljanje učionica i prostorija, te je obavljena sanacija podrumskih

## Potpisan Ugovor o finansiranju projekata cestovne infrastrukture za 2024. godinu



*Ulaganje u infrastrukturu Starog Grada*

Načelnik Općine Stari Grad Sarajevo, Irfan Čengić i federalna ministrica prometa i komunikacija, Andrijana Katić, potpisali su Ugovor o dodjeli sredstava za sanaciju cestovne infrastrukture od značaja za općinu Stari Grad Sarajevo u iznosu od 247.810,97 KM.

«Čestitam ministrici Andrijani Katić na uvođenju transparentnog sistema podrške lokalnim zajednicama za saobraćajnu infrastrukturu. Ove godine su prvi put na ovaj način podržani projekti lokalnih zajednica. Pored ovih projekata, Ceste Federacije BiH i ovo ministarstvo, u ovoj godini, sanirali su dio tranzita na magistralnom putu M5 od Bistrik stanice do tunela. Također, programom Vlade FBiH podržana je rekonstrukcija ceste za Barice na kojoj radovi uskoro počinju», istakao je načelnik Čengić.

Općina Stari Grad Sarajevo ispunila je uslove Javnog poziva određene Programom utroška sredstava „Kapitalnih transfera drugih nivoa vlasti i fondova – Transfer za izgradnju autocesta, brzih cesta, magistralnih i drugih cesta” utvrđenih Budžetom Federacije BiH za 2024. godinu. Ovaj važan dokument obuhvata finansiranje različitih infrastrukturnih projekata koji će se realizovati u narednom periodu. Načelnik Čengić izrazio je zadovoljstvo zbog potpisanog Ugovora, ističući kako će navedeni projekti značajno unaprijediti infrastrukturne kapacitete Općine Stari Grad Sarajevo.



*Načelnik Čengić i federalna ministrica Katić*

## Projekti



*Obnova škole na Hridu*

prostorija objekta, uz postavljanje novih klupica na svim ugrađenim prozorima. Vrijednost projekta iznosi oko 530.000 KM, koje je Ministarstvo za odgoj i obrazovanje KS izdvojilo, dok je Općina provela tendersku dokumentaciju. U skorije vrijeme je na krovu škole već izvršena sanacija svjetlarnika, a slijedi rekonstrukcija kupole, čija cijena radova iznosi oko 45.000 KM. Također, u toku je i tekuće održavanje fasade školskog objekta, što uključuje njenu sanaciju i farbanje, čija je vrijednost oko 128.000 KM.

## Nova fasada za OŠ “Šejh Muhamed ef. Hadžijamaković”

Na Hridu u OŠ “Šejh Muhamed ef. Hadžijamaković” već dva mjeseca traju radovi u sklopu projekta Akcionog plana EBRD-a “Zeleni gradovi”. Projekt je finansiran sa tri miliona eura bespovratnih sredstava od Evropske unije i osam miliona eura povoljnih kredita od EBRD-a.

Projekt implementira Vlada Kantona Sarajevo od 2022. godine. U planu je poboljšanje energetske efikasnosti na 40 javnih objekata u Kantonu Sarajevo. Od tog broja, 17 ustanova su škole, među kojima i starogradska OŠ „Šejh Muhamed ef. Hadžijamaković”.

Kao rezultat ovih investicija, očekuje se da će potrošnja energije u objektima i emisije karbondioksida biti prepolovljene. Ovo uključuje i viši kvalitet grijanja i hlađenja, a samim tim i bolju



*Uređenje Čolinog i Ramića potoka*

udobnost za korisnike ovih javnih zgrada, kao i značajne uštede u budžetu Kantona Sarajevo.

## Uređenje Čolinog i Ramića potoka

Općina Stari Grad Sarajevo aktivno radi na uređenju Čolinog i Ramića potoka putem Službe za investicije i komunalne poslove. Cilj ovih aktivnosti je osigurati normalan protok vode i smanjiti rizik od poplava u ovim područjima. U sklopu ovog projekta, uklanja se otpad, šibljje i mulj iz korita potoka. Važno je istaknuti da Općina djeluje preventivno, čisteći potoke tokom cijele godine kako bi se spriječilo nakupljanje otpada koje bi moglo uzrokovati začepljenje i poplave tokom obilnijih padavina. Ovakav pristup održavanju omogućava kontinuiranu sigurnost i funkcionalnost Čolinog i Ramića potoka. Ukupna vrijednost radova za ove projekte iznosi oko 80.000 KM, a izvođač



## Projekti

radova je Telefongradnja d.o.o. Sarajevo.

Ovaj angažman Općine Stari Grad Sarajevo pokazuje njihovu posvećenost očuvanju okoliša i sigurnosti građana kroz poboljšanje infrastrukture i vodnog uređenja.

## Sanacija ulica u Starom Gradu: Načelnik Čengić i vijećnici obišli radove

Općinski načelnik Irfan Čengić, zajedno s vijećnicima Emir Bićom i Amrudinom Džanovićem, posjetio je stanovnike ulice Pod Hridom (MZ Hrid-Jarčedoli) gdje su u toku radovi sanacije ulice duge 220 metara. Ovi infrastrukturni radovi, ukupne vrijednosti 109.000 KM, finansiraju

Općina Stari Grad i Vlada Kantona Sarajevo, dok je izvođač firma Mušinbegović gradnja d.o.o. Visoko. Načelnik Čengić istakao je važnost direktne komunikacije s građanima i naglasio dobru saradnju između Općine i Kantona.

Osim toga, načelnik Irfan Čengić je, uz predsjedavajućeg Općinskog vijeća Seida Škaljića i vijećnika Muamera Mekića, obišao radove i na sanaciji ulice Hadžijska ravan u Mjesnoj zajednici Moščanica. Ovo je 11. ulica na kojoj se vrše radovi u ovoj građevinskoj sezoni.

“Iako smo naslijedili ograničene projekte i resurse, naš cilj je da realizujemo najvažnije infrastrukturne projekte. Svi ovi radovi predstavljaju najveća ulaganja u saobraćajnice Starog Grada, a to smo postigli zahvaljujući izuzetnoj saradnji između Općine Stari Grad Sarajevo, Vlade Kantona Sarajevo i Vlade Federacije BiH.“



Načelnik Čengić redovno obilazio infrastrukturne radove



Sa obilaskom radova u ulici Hadžijska ravan

## Rekonstrukcija vodovodne mreže u Starom Gradu



### Cilj projekata spriječiti redukcije vode

Projektom KJKP “Vodovod i kanalizacija” i Vlade Kantona Sarajevo, finansiranog sredstvima Evropske banke za obnovu i razvoj (EBRD), radi se na rekonstrukciji cjevovoda i priključaka u 20 ulica na području Starog Grada. Do sada je završena rekonstrukcija cjevovoda u ulici Alajbegovića i Isevića sokak, u kojima je, po završetku radova, urađen i novi sloj asfalta, a u toku su radovi i u ulicama Karpuzova, Čadordžina, Adžemovića i Sedrenik. Ove rekonstrukcije predstavljaju jedno od većih ulaganja u vodovodnu mrežu u Starom Gradu posljednjih godina.

Načelnik Općine Stari Grad Sarajevo, Irfan Čengić, istakao je da se projekat provodi s ciljem smanjenja gubitaka vode, koji su prije više od pet godina rezultirali značajnim redukcijama u snabdijevanju.

Pored nabrojanih ulica, u narednom periodu obavljat će se radovi na vodosistemu u ulicama Čemerlina, Hrgića, Toromanova, Kečina, Safvet bega Bašagića, Mula Mustafe Bašeskije (dionica trase koja se odnosi na trotoare na dijelu koji pripada Općini Stari Grad), Potok, Prijepoljčeva i Ulomljenica, Potoklinica, Edhema Mulabdića, Josipa Štadlera i Telali.

## Potpisan ugovor za sanaciju klizišta



### Načelnik Čengić i ministar Nedić

U prostorijama Federalnog ministarstva prostornog uređenja 25.06.2024. godine potpisan je Ugovor o sufinansiranju projekta Sanacija klizišta - rekonstrukcija postojeće saobraćajnice i izgradnja potpornog zida u ulici Trčivode 46. Ugovor su potpisali načelnik Općine Stari Grad Sarajevo Irfan Čengić i ministar Željko Nedić.

Prema ovom Ugovoru Federalno ministarstvo prostornog uređenja sufinansirat će projekt Općine sa 80.000 KM.

## Projekti

# Poboljšanja infrastrukture za bolje životne uslove

**Sanacija ulice Ablagijin sokak na Mošćanici ● Sanacija kraka ulice Balibegovica čikma na Bistriku ● Asfaltiran makadam u ulici Poddžebhana na Vratniku ● Na Širokači sanirana ulica Za Beglukom**

Unastojanju da unaprijedi infrastrukturu i životne uslove građana, Općina Stari Grad Sarajevo kontinuirano provodi projekte sanacije i rekonstrukcije važnih saobraćajnica. Ovi projekti ne samo da povećavaju sigurnost i pristupačnost, već također oblikuju urbano okruženje prema potrebama lokalne zajednice.

## Na Širokači sanirana ulica Za Beglukom

Završeni su radovi na sanaciji dijela ulice Za Beglukom – plato Širokača, čija vrijednost iznosi oko 260.000 KM, a površina radova obuhvatala je oko 1.450 m<sup>2</sup>. Ovi radovi obuhvatali su niz aktivnosti usmjerenih ka osiguranju stabilnosti i dugotrajnosti ceste, kao i njenom optimalnom funkcionisanju u svim vremenskim uslovima. Među tim aktivnostima su uklanjanje dijelova asfalta i zamjena granitne kocke, čišćenje šahtova i slivnika, te izrada poprečne drenaže. Posebno se ističe ugradnja pojasa kocke širine 2 metra na svakih 20 metara dužine ulice, što je pažljivo odabrani pristup uzimajući u obzir terenske karakteristike i potrebu za održavanjem funkcionalnosti ulice tokom cijele godine, posebno u zimskim uslovima.

## Sanacija ulice Ablagijin sokak na Mošćanici

Načelnik Općine Stari Grad Sarajevo, Irfan Čengić, zajedno sa predsjedavajućim Općinskog vijeća Seidom Škaljićem i vijećnicima Almom Hasanović, Muamerom Mekićem i Emirrom Bićom, je 15.07.2024. godine posjetio stanovnike ulice Ablagijin sokak u Mjesnoj zajednici Mošćanica, gdje je nedavno izvršena sanacija dijela te ulice. Na inicijativu mještana i u skladu s us-



*Za Beglukom*



*Načelnik Čengić i vijećnik Bićo obišli stanovnike ulice Ablagijin sokak*

vojenim Godišnjim planom i programom održavanja i zaštite, kao i programom rekonstrukcije, izgradnje i obnove saobraćajnica za 2024. godinu, Općina Stari Grad Sarajevo provela je sanaciju pristupnog makadamskog puta na ulici Ablagijin sokak, dužine oko 150 metara. Radovi su obuhvatili rušenje i uklanjanje

postojećih kolničkih konstrukcija, iskop zemljanog materijala, uređenje plenuma temeljnog tla, izradu i betoniranje objekata za osiguranje saobraćajnice, izradu nevezanog nosivog sloja, te izradu nosivog asfaltnog sloja s bankinama. Ukupna vrijednost provedenih radova iznosila je oko 48.400 KM.

## Sanacija kraka ulice Balibegovica čikma na Bistriku

Završena je sanacija dijela ulice Balibegovica čikma na Bistriku. Stanovnici lokaliteta su se u više navrata obraćali sa zahtjevom za sanaciju ove ulice, na kojoj se nalazio ispucani i pohabani asfalt. Stanje ove ulice posebno je otežavalo kretanje stanovnicima prilikom zimskih mjeseci, a posebno onima starije životne dobi.

Sanacija ulice dužine oko 35 metara izvršena je u okviru Godišnjeg plana i programa održavanja i zaštite, kao i programa rekonstrukcije, izgradnje i obnove saobraćajnica čiji je upravitelj Općina Stari Grad Sarajevo za 2024. godinu. Urađeno je rušenje i uklanjanje kolničkih konstrukcija, iskopi zemljanog materijala, uređenje plenuma temeljnog tla, izrada nezvezanog nosivog sloja, izrada nosivog asfaltnog sloja sa bankinama.

## Urađena sanacija dijela ulice Tale Ličanina

U proteklom periodu urađena je i sanacija dijela ulice Tale Ličanina do broja 12. Ovaj lokalni put je smješten u mjesnoj zajednici Širokača i saniran je u dužini od oko 35 metara. Radovi u ulici Tale Ličanina uključivali su sljedeće: uklanjanje oštećenog asfalta, uređenje podloge, te podizanje i nivelisanje postojećih šahtova. Radovi su koštali oko 8.000 KM.

## Asfaltiran makadam u ulici Poddžebhana na Vratniku

Načelnik Općine Stari Grad Sarajevo Irfan Čengić je 09.07.2024. godine, zajedno sa vijećnicima Srđanom Simonovićem, Emirom Bićom i Muamerom Mekićem posjetio stanovnike ulice Poddžebhana u starogradskom naselju Vratnik, gdje je urađena sanacija i asfaltiranje makadamskog puta. Sanirana je ulica dužine oko 145 metara, a ukupna vrijednost radova iznosila je oko 32.000 KM.



Balibegovica čikma



Tale Ličanina



Ulica Poddžebhana



Cjevovod u ulici Sedrenik

“Kako smo i obećali, nakon završetka radova na prvih 5 ulica nastavljamo sanaciju ulica u Starom Gradu. Drago mi je da smo asfaltirali dio ulice Poddžebhana u kojoj je ranije bio makadam. Osim potreba stanara, ova ulica vodi i do nacionalnog spomenika Bijela tabija. Sada nastavljamo sa milionskim ulaganjima u saobraćajnu infrastrukturu, a najznačajnija investicija počinje 14. jula, kada će Ministarstvo saobraćaja i Direkcija za ceste KS početi sanaciju glavne saobraćajnice uz šine u cijeloj dužini u Starom Gradu”, naglasio je načelnik Čengić.

## Završeni radovi na rekonstrukciji cjevovoda u ulici Sedrenik

Projektom KJKP “Vodovod i kanalizacija” i Vlade Kantona Sarajevo, finansiranog sredstvima Evropske banke za obnovu i razvoj (EBRD), radi se na rekonstrukciji cjevovoda i priključaka u 20 ulica na području Starog Grada. Trenutno

### Javni poziv JKP Općine Stari Grad

Javno komunalno preduzeće “Općine Stari Grad” d.o.o. objavilo je Javni poziv za prikupljanje prijave za mjesečni najam rezervisanog parking mjesta ili mjesečnu parking kartu. Pozivamo fizička i pravna lica sa područja općine Stari Grad da iskažu svoje potrebe i podnesu prijavu na ovaj Javni poziv. Sve detalje moguće pronaći na web stranici preduzeća [www.jkposg.ba](http://www.jkposg.ba)

su aktivni radovi u 5 ulica, a završeni su u ulici Alajbegovića i Isevića sokak i sada Sedrenik. Ove rekonstrukcije predstavljaju jedno od većih ulaganja u vodovodnu mrežu u Starom Gradu posljednjih godina u ukupnom iznosu od 4,7 miliona KM. Pored ovih koje su završene, ulice u kojima je planirano ulaganje u svrhu rekonstrukcije cjevovoda ove sezone su Čemerlina i Hrgića, Toromanova i Kečina, Safvet-bega Bašagića, Mula Mustafe Bašeskije (dionica trase koja se odnosi na trotoare na dijelu koji pripada Općini Stari Grad), Potok, Prijepoljčeva i Ulomljenica, Potoklinica, Edhema Mulabdića i Josipa Štadlera, Tela-li, te Karpuzova, Adžemovića i Čadordžina.

## Općinsko vijeće

### 38. sjednica

#### Općinskog vijeća

Krajem juna održana je 38. redovna sjednica Općinskog vijeća Stari Grad Sarajevo, na kojoj su vijećnici razmotrili obiman dnevni red. Stručna služba kabineta Općinskog načelnika



**Donesena Odluka o utvrđivanju Dana formiranja brigada ARBiH**

predložila je niz akata koji su također bili na dnevnom redu, uključujući Odluke o utvrđivanju dana formiranja brigada Armije Republike BiH, Odluke komunalnom redu, osnivanju Zdravstvenog savjeta te imenovanju vršioca dužnosti predsjednika i članova Nadzornog odbora i Odbora za reviziju Javnog komunalnog preduzeća Općine Stari Grad.

“Saradnja sa Općinskim vijećem je najvažniji faktor u uspješnoj realizaciji milionskih projekata. Održana je još jedna produktivna sjednica na kojoj su usvojeni važni akti. Nizom odluka je potvrđeno opredjeljenje da sve javne resurse i parkinge stavimo u funkciju zajednice, a ne privatnih lica, bez obzira na pritiske koje trpimo”, naglasio je načelnik Irfan Čengić.

Služba za privredu raspravljala je o odlukama o dodjeli u zakup poslovnih prostora na nekoliko adresa unutar općine, kao i odlukama o unosu poslovnih prostora u registar Općine Stari Grad. U okviru tačka iz nadležnosti Službe za investicije i komunalne poslove razmatrane su i usvojene odluke o utvrđivanju davalaca komunalne usluge na području općine Stari Grad, o utvrđivanju cijena po zonama za dodjelu parking mjesta davaocu komunalne usluge na području općine Stari Grad kao i pojedinačne odluke o dodjeli konkretnih lokacija odnosno parking prostora JKP Općine Stari Grad. Također, ključni dokument koji je usvojen, a prethodio je usvajanju ovih odluka je Zaključak o usvajanju saobraćajnog elaborata parkiranja na području Općine Stari Grad. Sjednica je zaključena informacijom o nedavnoj dodjeli u zakup poslovnih prostora putem javnog oglasa.

### 39. sjednica

#### Općinskog vijeća

Općinsko vijeće je dalo saglasnost na Pravilnik o popunjavanju upražnjenih radnih mjesta namještenika putem internog oglašavanja. Također, data je saglasnost Općinskom načelniku za pokretanje aktivnosti na istraživanju zakonskih mogućnosti za zaduživanje putem obveznica. Kao i na prethodnim sjednicama značajan dio tačaka se odnosio na pitanja vezana za rad Javnog komunalnog preduzeća Općine Stari Grad, te je data saglasnost na odluku o imenovanju direktora JKP OSG Filipović Damira, i dodjeljena su pojedinačna parking mjesta prema ranije usvojenom elaboratu.

Poseban naglasak stavljen je na mlade: usvojen je Nacr strategije prema mladima za period od 2024. do 2028. godine, uz set pravilnika kojima se reguliraju prava učenika i studenata na stipendije



**Damir Filipović, direktor JKP OSG**

te postupak organizacije sportskih liga. Općinsko vijeće je također razmotrilo i usvojilo Rebalans Budžeta, koji je pažljivo pripremljen uzimajući u obzir sve relevantne projekte i potrebe naših građana. Uz navedene aktivnosti, razmatrani su i usvojeni drugi akti iz nadležnosti službe za privredu te službe za boracko-invalidsku zaštitu.

Načelnik Irfan Čengić izrazio je zadovoljstvo radom Općinskog vijeća proteklih osam mjeseci, istaknuvši da je vijeće razmatralo i usvojilo čak 330 tačaka dnevnog reda.

“Zahvaljujem svim vijećnicima na saradnji, aktivnostima i dostojanstvenom radu i onda kada se ne slažemo. Posebno zahvaljujem predsjedavajućem Seidu Škaljiću koji je vodio ove uspješne procese, šefovima klubova i mojim saradnicima iz kabineta koji su mnogo truda ulagali u pripremu sjednica. Ponosan sam na sve procese koje ste iznijeli u zadnjih godinu dana i možete biti primjer drugim Općinskim vijećima kako treba da se radi”, izjavio je načelnik Čengić.

### Vanredna sjednica

#### Općinskog vijeća

Na Vanrednoj sjednici Općinskog vijeća Stari Grad, održanoj 10.07.2024. godine, odlučeno je o ključnim pitanjima vezanim za funkcionisanje Javnog komunalnog preduzeća „Općine Stari Grad“ d.o.o. Sarajevo. Na dnevnom redu našle su se dvije važne tačke, od kojih je jedna bila usvajanje Prijedloga zaključka o cijenama parking zona na području općine Stari Grad Sarajevo.



**Određene parking zone i cjenovnik**

d.o.o. Sarajevo utvrdilo je četiri parking zone (I, II, III i IV) koje će regulisati cijene za dodjelu parking mjesta korisnicima parkirišta na području Starog grada. Ova odluka ima za cilj bolju organizaciju parkiranja i efikasniju raspodjelu resursa, prilagođavajući tarife potrebama stanovnika i posjetitelja općine.

Vijećnici su također podržali odluke o dodjeli većeg broja parking prostora JKP „Općine Stari Grad“ d.o.o. Sara-

jevo, što će doprinijeti poboljšanju uslova za sve korisnike parking usluga širom Starog Grada.

Prema usvojenom prijedlogu, JKP „Općine Stari Grad“

# Šefovi klubova u Općinskom vijeću Stari Grad odgovaraju na pitanje: „Kako komentarišete rad Općinskog vijeća Stari Grad Sarajevo u ovoj godini?”

**Odgovorani i savjestan rad ● Jednoglasno donesene brojne odluke ● Dobra saradnja sa općinskim načelnikom i službama Općine Stari Grad**

## Emir Bićo,

šef Kluba Narod i pravda

*Općinsko vijeće je u protekloj godini pokazalo visok nivo profesionalizma, punu posvećenost onome što mandat općinskog vijećnika podrazumijeva, zaštitu i jačanju institucije općine i istovremenom senzibilitetu ka potrebama građana koje vijećnici predstavljaju. Protekla godina se može okarakterisati kao uspješna.*

## Almedin Miladin,

šef Nezavisnog kluba Miladin-Skorupan

*Rad u ovoj godini Općinskog vijeća je bio produktivan. Pogotovo sto su nadležnosti vijeća i izvršne vlasti bile nedefinisane i oprečne u prošlosti. Vidim jednu novu energiju sa novim načelnikom Čengićem koja već daje rezultat. Općina postaje jedan ozbiljan servis građanima.*

## Merima Arnautović,

šef Nezavisnog kluba

Arnautović-Kiseljaković:

*Općinsko vijeće Stari Grad u ovoj godini pokazalo je posvećenost unaprjeđenju transparentnosti i jednakih šansi za sve. Vijeće je donijelo veliki broj važnih odluka i pravilnika.*

## Alma Hasanović,

šef Nezavisnog kluba

Dodik-Hasanović

*Općinsko vijeće na čelu sa predsjedavajućim Seidom Skaljčićem preuzelo je veliku odgovornost u vrijeme krize. Dolaskom načelnika Irfana Čengića stvoren je još bolji ambijent za rad, te smo dokazali da, iako dolazimo iz različitih političkih opcija, većinu odluka smo podržali jednoglasno.*



Vijećnici Mekić, Hasanović i Bićo zadovoljni ovogodišnjim dešavanjima u Općinskom vijeću



Almedin Miladin



Merima Arnautović



Adla Kupusović



Vedad Deljković



Sejfo Šehović

## Muamer Mekić,

šef Kluba Socijaldemokratska partija

*Nakon svih dešavanja u našoj Općini i turbulencija Općinsko vijeće je bilo stabilizirajući faktor. Broj donesenih odluka u proteklom periodu jasno to pokazuje. Zajedno sa općinskim načelnikom uradili smo sve da instituciju Općine kao jedinice lokalne samouprave vratimo onima kojima i pripada, građanima.*

## Adla Kupusović,

šef Kluba Naša stranka

*Smatram da je Općinsko vijeće ove godine odradilo nevjerovatan posao, veliki broj usvojenih odluka i drugih akata koji će uveliko olakšati život naših sugrađana i sugrađanki govore tome u prilog.*

## Vedad Deljković,

šef Nezavisnog kluba Deljković-Simonović

*Nakon jednog poprilično teškog vremena i prošlogodišnjih dešavanja sa bivšim općinskim načelnikom, Općinsko vijeće Stari Grad pokazalo je jednu sinergiju i što je najbitnije spremnost da radi isključivo u interesu građana. Ova godina je godina bez ikakvih velikih turbulencija na našim sjednicama.*

## Sejfo Šehović,

šef Kluba Narodni evropski savez

*Ja sam poprilično zadovoljan ukupnim radom Općinskog vijeća Stari Grad u ovoj godini. Mi vijećnici smo se trudili da većinom glasova odobrimo sve pripremljene tačke. Svim vijećnicima koji će se kandidovati za sljedeći saziv Općinskog vijeća Stari Grad želim mnogo sreće.*

**Intervju sa Seidom Škaljićem, predsjedavajućim Općinskog vijeća Stari Grad Sarajevo**

## Predsjedavajući Škaljić: Fokus mog četverogodišnjeg djelovanja u Općinskom vijeću Stari Grad su bili privrednici, mladi i socijalno ugroženi naše općine

**Od decembra 2022. na funkciji predsjedavajućeg Općinskog vijeća Stari Grad ● Dugogodišnje iskustvo rada ● Vrlo izazovan mandat 2020-2024 ● Želja za boljim razumijevanjem od strane viših nivoa vlasti ● Poruka za građane Starog Grada**

**S**eid Škaljić općinski je vijećnik od davne 2012. godine, a kako često navodi, kandidovanje za tu poziciju rezultat je revolta i nezadovoljstva. Prema njegovom mišljenju, za konkretne i pozitivne promjene, nekad je neizbježno aktivno se uključiti u politiku. O toj, ali i brojnim drugim temama smo razgovarali sa predsjedavajućim Općinskog vijeća Stari Grad Seidom Škaljićem.

***S obzirom da niste obavljali funkciju predsjedavajućeg OV-a Stari Grad od njegovog konstituiranja, koje su okolnosti dovele do preuzimanja te funkcije i kako ste se snašli u početku?***

Nakon održavanja Općih izbora 2022. godine u BiH, bivši predsjedavajući je otišao iz Općinskog vijeća. Time je pozicija predsjedavajućeg vijeća ostala nepopunjena. Ja sam predložen za tu poziciju i u decembru 2022. godine sam jednoglasno izabran za novog predsjedavajućeg Općinskog vijeća Stari. Velika je čast što su me sve kolegice i kolege podržale. Oni koji me poznaju ili su imali priliku da sarađuju samnom, znaju da ja interese građana i lokalne zajednice stavljam na prvo mjesto. Sve kolegice i kolege vijećnici su kod mene ravnopravni i njihova politička opredjeljenost za mene ne igra veliku ulogu. Meni je važno da posvećeno rade u skladu sa zakletvom koju su položili prilikom preuzimanja svog vijećničkog mandata.

***Šta ste kao vijećnik do tog momenta učinili, šta konkretno izdvojate?***

Ja sam i dalje vijećnik u Općinskom vijeću. To što sam ujedno i predsjedavajući ne mijenja nešto poseb-



Seid Škaljić, predsjedavajući Općinskog vijeća Stari Grad Sarajevo

no moju vijećničku ulogu. Posebno sam ponosan što sam uspio skrenuti veći fokus na naše privrednike sa velikim naglaskom na mlade. Veliki broj novopokrenutih i uspješnih poslovnih ideja se rodilo iz Start-up programa naše Općine. Fondovi su u velikoj mjeri povećani i drago mi je da mladi ostaju na području naše Općine. Briga za socijalno ugrožene kategorije je također bila u fokusu mog rada i drago mi je da je i za tu kategoriju urađeno jako mnogo.

***Kako ocijenjujete situaciju u kojoj se Općina Stari Grad Sarajevo našla od maja mjeseca 2023. godine i reakcije Općinskog vijeća na istu, pogotovo Vas kao predsjedavajućeg?***

Općina Stari Grad se našla u poziciji blokade kao ni jedna Općina do sada u Bosni i Hercegovini. Njeno normalno funkcionisanje i redovno pružanje usluga i izmirivanje obaveza je bilo na samoj granici. Ja sam u skladu sa svojim nadležnostima uradio sve da se ublaži taj prvi trenutak neiz-

vjesnosti. Vidio sam da je veliki broj građana bio uplašen za svoje predmete, što je i sasvim razumno. I uposlenici su bili zabrinuti za svoj status i nastavak rada. Vrlo brzo sam stupio u kontakt sa svim relevantnim institucijama, razgovarao sa svim kolegama iz vijeća. Upoznao sve da je interes građana i normalno funkcionisanje Općine kao institucije za mene najviši prioritet. Općinsko vijeće se u tom periodu postavilo vrlo profesionalno. Mislim da trenutno ne postoji sastav vijeća koji je više opredjeljen za svoje građane, a za mene je to posebna satisfakcija kao predsjedavajućeg.

***Koje su pozitivne, a koje negativne strane rada Općinskog vijeća Stari Grad 2020-2024?***

Mnogo pozitivnog je urađeno u našoj Općini. Pogotovo su zadnje dvije godine za našu Općinu i Općinsko vijeće bile jako važne. Pokrenuli smo projekte koju su čekali godinama, realizovali inicijative koje su od koristi za sve građane. Vijeće je osnovalo prvo javno komunalno preduzeće u Starom



*Dobra saradnja sa kolegama vijećnicima, načelnikom i općinskim službama*

Gradu. Jedan veliki korak za ovu instituciju. Nakon 11 godina smo usvojili novi Statut, usvojili Strategiju razvoja Općine koja je čekala 7 godina. Samo podatak da smo od novembra 2023. do jula 2024. godine usvojili preko 320 tačaka dnevnog reda na 9 redovnih sjednica i dvije vanredne sjednice govori da je ovaj sastav Općinskog vijeća vrlo aktivno radio. Jedino negativno što mogu spomenuti je činjenica da često nemamo razumijevanje od viših nivoa vlasti sa projekte i inicijative koje pokrećemo.

### ***Na šta ste posebno ponosni, a na šta i ne baš, obavljajući funkciju predsjedavajućeg Općinskog vijeća Stari Grad?***

Posebno mi je drago što sam kroz svoj rad imao priliku da upoznam sjajne mlade ljude sa naše općine. Nadarene studente koji ostvaruju izvanredne rezultate u akademskoj zajednici, ali i u svojoj profesiji. Mlade sportiste koji su obišli cijeli svijet i vratili se sa medaljama, razna kulturno-umjetnička društva za koje lično smatram da su naši na-

jbolji ambasadori, razna udruženja koja se svakodnevno bore sa administrativnom džunglom kako bi zaštitili svoje članove. Na stotine građana koji su, ili došli kod mene u kancelariju, ili sam bio na licu mjesta i razgovarao sa njima. To je ono na što sam posebno ponosan. Biti vijećnik znači da čuješ ono što ti komšiluk govori i ti preneseš u vijeće. Naravno, nisam ponosan na svaki problem koji nisam mogao riješiti našim građanima. Važno je da je mnogo veći broj uspješno realizovanih od onih koje se nisu mogle riješiti.

## Poruka za građane Općine Stari Grad

Dragi građani, drage komšije. Naša općina je već stoljećima sinonim za suživot, raznolikost i razvoj. Općinsko vijeće i Općina Stari Grad žele da čuvaju i održe tradiciju, ali i da unaprijedimo i podignemo kvalitet života za sve ljude. Veliki broj turista treba da ponese sa sobom samo najljepše uspomene iz naše općine i da i dalje ostane najpoželjnija destinacija za posjetiti. Za naše stanovnike Općine Stari Grad želimo još bolje uslove za život. Mladima pomoći u podizanju svojih porodica, a generaciji treće starosne dobi svu podršku i servis koji zaslužuju. Hvala Vam na prilici da razgovaramo i realizujemo mnoge dobre projekte. Naša općina ima jedinstvenu priliku da napravi veliki iskorak i postane ono što zaslužuje. Najbolje mjesto za život svih generacija.



## Podrška građanima

# Izabrani projekti neprofitnih udruženja za finansiranje u 2024. godini

Općina Stari Grad Sarajevo će u 2024. godini finansirati i sufinansirati projekte neprofitnih udruženja i fondacija putem sredstava iz Budžeta Općine. Javnim pozivom, otvorenim za sve zainteresovane organizacije, izabrani su projekti koji će doprinijeti razvoju lokalne zajednice.

Načelnik Općine Stari Grad Sarajevo, Irfan Čengić je potpisao ugovore sa predstavnicima izabranih neprofitnih udruženja i fondacija. "Nastavljamo sa podrškom inovativnim i korisnim projektima koji dolaze iz naše zajednice. Vjerujemo da će odabrani projekti donijeti konkretne koristi našim građanima i unaprijediti različite aspekte života u Starom Gradu," istakao je načelnik Čengić.

Na osnovu rezultata evaluacije prve grupe projekata organizacija civilnog društva koji su prispjeli po Javnom pozivu za 2024. godinu, ukupno je odobreno finansiranje, odnosno sufinansiranje za 45 projekata nevladinih/neprofitnih organizacija koji će biti realizovani na području općine Stari Grad Sarajevo u toku 2024. godine.



*Podrška neprofitnim udruženjima i fondacijama*



*Projekti za razvoj lokalne zajednice*

Općina Stari Grad Sarajevo je 5. aprila 2024. godine raspisala Javni poziv za realizaciju projekata nevladinih i neprofitnih organizacija, koji će ostati otvoren do 30. novembra 2024. godine. Ovi projekti obuhvataju širok spektar aktivnosti, od kulturnih i obrazovnih programa, preko socijalnih inicijativa, pa sve do ekoloških projekata koji će doprinijeti očuvanju i zaštiti životne sredine.

Općina Stari Grad Sarajevo je 5. aprila 2024. godine raspisala Javni poziv za re-

# Potpisani ugovori o dodjeli plastenika sa dodatnom opremom

U Općini Stari Grad Sarajevo je 03.07.2024. godine održano potpisivanje ugovora o dodjeli plastenika površine 50 m<sup>2</sup> i 30 m<sup>2</sup> sa dodatnom plasteničkom opremom. Načelnik Općine Stari Grad Irfan Čengić potpisao je ugovore s kandidatima koji su ispunili uslove propisane Javnim pozivom, a koji u prethodne četiri godine nisu ostvarili pravo na donaciju, dodjelu ili sufinansiranje nabavke plastenika.

"Projekat podjele plastenika građanima na području općine Stari Grad ima ogroman značaj za našu zajednicu. Ovom aktivnošću pružamo podršku lokalnim poljoprivrednicima i građanima koji se bave uzgojem vlastite hrane. "Na ovaj način ne samo da potičemo ekonomski razvoj, već i promovišemo održivu poljoprivredu te smanjujemo negativan uticaj na životnu sredinu", istakao je načelnik Čengić.

Podjela plastenika građanima omogućuje proizvodnju svježeg, organskog povrća, doprinosi zdravijem načinu života i jača osjećaj zajedništva unutar općine. Kroz ovaj projekt ulažemo u



*Podrška lokalnim poljoprivrednicima*

bolju i održiviju budućnost svih nas. Ranije je usvojena Uredba o utvrđivanju uslova, postupaka i kriterija za ostvarivanje prava na dodjelu plastenika sa dodatnom opremom za plastenike na području općine Stari Grad Sarajevo. Na osnovu te Uredbe, Komisija je dostavila Prijedlog rang liste i Odluku o odabiru kandidata. Na osnovu tog prijedloga, pravo na platenik ostvarila su 73 korisnika.



*Pravo na platenik ostvarila su 73 korisnika*





## Delegacija Općine Stari Grad prisustvovala komemoraciji u Potočarima i podržala rad Memorijalnog centra Srebrenica

**Delegacija Općine, 11. jula 2024. godine prisustvovala je komemorativnoj sjednici, klanjanju džezaze i polaganju cvijeća u Memorijalnom centru u Potočarima ● Tokom ceremonije, ukopani su posmrtni ostaci 14 identifikiranih žrtava genocida**

Ove godine, po prvi put, 11. juli se obilježavao i kao “Međunarodni dan sjećanja i obilježavanja genocida počinjenog u Srebrenici 1995. godine”, zahvaljujući Rezoluciji koju je usvojila Generalna skupština Ujedinjenih nacija. Općina Stari Grad nastavlja pružati podršku Memorijalnom centru Srebrenica putem potpisanog ugovora kojim se osigurava kontinuirano očuvanje sjećanja na žrtve genocida.

### Obilježavanje 29. godišnjice genocida u Srebrenici uz međunarodno priznanje

Delegacija Općine Stari Grad, predvođena načelnikom Irfanom

Čengićem i vijećnicima Muamerom Mekićem, Sabahudinom Arapovićem i Sejfom Šehovićem, prisustvovala je 11. jula 2024. godine komemorativnoj sjednici, klanjanju džezaze i polaganju cvijeća za žrtve genocida u Memorijalnom centru u Potočarima, povodom obilježavanja 29. godišnjice genocida nad Bošnjacima “Sigurne zone UN-a” Srebrenica.

Ovaj datum je prvi put obilježen i kao “Međunarodni dan sjećanja i obilježavanja genocida počinjenog u Srebrenici 1995. godine”, nakon što je Generalna skupština Ujedinjenih nacija 23. maja ove godine izglasala Rezoluciju o genocidu u Srebrenici. “Naša trajna obaveza je da čuvamo od zaborava žrtve genocida u Srebrenici, našu najbolniju ranu,” istakao je načelnik Čengić.

Tokom ceremonije, obavljen je ukop posmrtnih ostataka 14 identifikiranih žrtava genocida iz jula 1995. godine: Hasisa Efendića (1931.), Čamila Efendića (1928.), Mehmeda Krdžića (1961.), Sabrije Omića (1966.), Mušana Šiljkovića



*Načelnik Čengić odao počast žrtvama genocida*



*Ukop posmrtnih ostataka 14 identifikiranih žrtava genocida*

## Saradnja

(1956.), Sakiba Harbaša (1975.), Beriza Mujića (1978.), Ahmeta Jašarevića (1971.), Nevresa Salihovića (1970.), Ibrahima Salkića (1935.), Midhata Bašića (1973.), Hajdina Mustafića (1959.), Latića Mandžića (1964.) i Hameda Salića (1927.).

## Ispraćaj žrtava iz Sarajeva

Devetog jula 2024. godine, delegacija Općine Stari Grad prisustvovala je ispraćaju tabuta s posmrtnim ostacima 14 žrtava genocida. Tužna kolona zaustavila se ispred Vijećnice u Starom Gradu, gdje ih je ispratila i delegacija Općine Stari Grad, na čelu sa načelnikom Irfanom Čengićem. Posmrtni ostaci krenuli su iz kompleksa Gradskog groblja Visoko, a nakon Sarajeva nastavljaju put do Potočara i nekadašnje fabrike akumulatora. Dženaza je planirana za 11. juli, a prisustvovat će joj i delegacija Općine Stari Grad.

### Podrška Memorijalnom centru Srebrenica

Općina Stari Grad i ove godine nastavlja podržavati rad Memorijalnog centra Srebrenica kroz očuvanje sjećanja na Međunarodni dan sjećanja na genocid u Srebrenici i sve druge aktivnosti koje provodi Memorijalni centar. Ugovor potpisan između Općine Stari Grad i Memorijalnog centra ima izuzetnu važnost jer omogućava kontinuirano održavanje i unapređenje aktivnosti koje nas podsjećaju na genocid iz jula 1995. godine.

“Očuvanje sjećanja na žrtve genocida nije samo čin poštovanja prema stradalima, već i važan korak ka izgradnji bolje budućnosti kroz edukaciju i podizanje svijesti o genocidu u Srebrenici,” poručio je načelnik Općine, Irfan Čengić. Prema potpisanom Ugovoru, Općina je uplatila 50.000 KM za rad Memorijalnog centra Srebrenica, čime se nastavlja pružati podrška ovoj važnoj instituciji.



Podrška Memorijalnom centru Srebrenica



Na ispraćaju tabuta s posmrtnim ostacima žrtava genocida

## Načelnik Čengić u posjeti gradonačelniku Izmiru i načelnici Karšijake

Na poziv kolega iz Izmiru, načelnik Općine Stari Grad Sarajevo, Irfan Čengić, boravio je u posjeti u gradu Izmiru. Tokom posjete, održao je više susreta od čega su najvažniji susret sa gradonačelnikom Izmiru, Cemilom Tugayem te načelnicom pobratimske Općine Karşıyaka Izmir, Behice Yıldız Ünsal.

"Ova posjeta je nastavak pobratimske saradnje između naših zajednica. Poseban fokus sam stavio na opstojnost direktne avionske linije Sarajevo-Izmir koja je uvedena ove godine zahvaljujući Vladi Kantona Sarajevo. Našoj općini je turizam od velike važnosti, te je povezanost sa ovim milionskim gradom u Turskoj za nas od velike ekonomske važnosti", istakao je načelnik Čengić. Također, načelnik Čengić naglašava da su razgovarali i o saradnji u oblasti kulturne saradnje i ulaganja u infrastrukturne projekte u Starom Gradu. Prilikom posjete, načelnik se sastao i sa gradskim vijećnikom Atillom Baysakom koji je nedavno predvodio delegaciju ove Općine u posjeti Općini Stari Grad.



Načelnika Čengića ugostila načelnica Karšiyake Behice Yıldız Ünsal



Gradonačelnik Izmiru Cemil Tugay i načelnik Čengić

# Stalni fokus Općine Stari Grad: Podrška sportu i mladim na razne načine

Općina Stari Grad Sarajevo nastavlja sa nesebičnim ulaganjem u mlade, sa posebnim akcentom na sportske aktivnosti i događaje. U posljednjem periodu, Općina Stari Grad pružila je podršku mladim akademikima, sportistima i sportskim manifestacijama.

## Nakon pet godina vraćaju se lige u sportu za starogradske osnovce

Općina Stari Grad ponovo će organizovati veoma popularna sportska ligaška takmičenja za svoje osnovce. Od ove jeseni, nakon pet godina pauze, starogradski osnovci će se ponovo takmičiti u fudbalu, košarci i odbojci. Početkom avgusta objavljen je Javni poziv za odabir udruženja/fondacije – partnera za organizaciju Liga osnovnih škola za školsku 2024/2025. godinu.

## Predsjedavajući Škaljić u razgovoru sa najuspješnijim studentima Starog Grada

Predsjedavajući Općinskog vijeća Stari Grad Seid Škaljić ugostio je starogradske studente, dobitnike najznačajnijih obrazovnih priznanja u Kantonu Sarajevo, zlatne i srebrene značke Univerziteta u Sarajevu.

Ukupno je 12 studenata iz Općine Stari Grad dobilo ovo vrijedno priznanje Univerziteta u Sarajevu. Krajem maja Općina Stari Grad objavila je Javni poziv za nagrađivanje studenata dobitnika priznanja „Zlatna i Srebrna značka“ Univerziteta u Sarajevu. Svih 12 studenata iz Starog Grada dobilo je novčane nagrade 500 KM – zlatna značka i 400 KM – srebrna značka.

„Veliko je zadovoljstvo biti u vašem

društvu. Od srca vam čestitam na postignutim rezultatima i želim uspjeh u profesionalnim karijerama. Općina Stari Grad oduvijek je na razne načine podržavala svoje mlade. Kao uspješnim akademskim građanima naše općine uvijek stojimo na raspolaganju za bilo kakve prijedloge, inicijative i pomoći“, poručio je diplomantima predsjedavajući Škaljić.

## U Starom Gradu na Bentbaši održan 10. ‘Bentbaša Cliff Diving’

Pred brojnom publikom na kulturnoj lokaciji Bentbaša u Starom Gradu održan je deseti po redu skok u Miljacku, poznat kao ‘Bentbaša Cliff Diving’. Ovaj spektakl privukao je ljubitelje adrenalina i

sporta.

Skakalo se sa visine od 19 metara i to u dvije kategorije, tradicionalni skokovi lasta i figurativni ‘high diving skokovi’. “Na ovogodišnjim desetim jubilarnim skokovima u vodu takmičilo se 19 skakača iz Bosne i Hercegovine i regije. Prvo mjesto je osvojio Evald Krnić iz Crne Gore (Tuzi). Drugi je bio Igor Arsenić iz Banja Luke, a treći Elvir Kovačević iz Konjica”, potvrdio je organizator manifestacije Dino Bajrić.

Ovogodišnji događaj su podržali Ministarstvo kulture i sporta KS, Grad Sarajevo, Općina Stari Grad Sarajevo, Olimpijski komitet BiH kao specijalni partner, Federalno ministarstvo kulture i sporta, Federalno ministarstvo turizma i okoliša, JU Zaštićena područja Kantona Sarajevo i drugi sponzori i kompanije.



Predsjedavajući Škaljić ugostio dobitnike zlatnih i srebrnih znački Univerziteta u Sarajevu



Starogradski osnovci opet će imati sportska takmičenja



Skokovi održani na Bentbaši

## Baščaršijske noći



# Baščaršijske noći u Starom Gradu: Festival kulture i umjetnosti

**Koncerti, izložbe i kulturni programi privukli brojne posjetitelje i turiste, dok je press konferencija održana u historijskoj Saburinoj kući**

**S**tari Grad Sarajevo, ovog jula bio je domaćin 28. izdanja festivala “Baščaršijske noći”. U periodu od 01. do 31. jula, brojni kulturno-umjetnički programi privukli su kako domaće tako i strane posjetitelje. Festival je organizovan od strane JU “Bosanski kulturni centar Kantona Sarajevo” uz podršku Vlade Kantona Sarajevo i Grada Sarajevo.

## Koncert Nermina Puškara u ulici Zelenih beretki

U okviru “Baščaršijskih noći”, u ulici Zelenih beretki u srcu Starog Grada nakon dugo vremena ponovo su se uživo čuli stari hitovi pjevača Nermina Puškara. Koncert je privukao veliki broj posjetitelja, koji su zajedno s Puškarom pjevali poznate pjesme poput “Dani prolaze” i “Jednom kad sve ovo bude”. Publika je s

oduševljenjem dočekala ovog popularnog pjevača, a ambijent ulice Zelenih beretki bio je ispunjen pozitivnom energijom.

## Otvorena izložba “Umjetnici Sarajevu”

Izložba “XI međunarodna izložba – Umjetnici Sarajevu”, koja je otvorena 10. jula u Gazi Husrev-begovom Hanikahu,

okupila je 30 umjetnika iz 9 zemalja, s ciljem da prikaže raznolike umjetničke stilove i pristupe. Oko 80 umjetničkih djela bila su izložena, nudeći posjetiteljima bogat uvid u savremenu umjetnost iz Bosne i Hercegovine, kao i iz regiona i svijeta. Izložba je bila značajan dio kulturnog programa “Baščaršijskih noći” i posjetiteljima pružila priliku da vide radove koji reflektiraju društvene i kulturne promjene.



*Koncert Nermina Puškara*



*Izložba održana u Gazi Husrev-begovom hanikahu*

## Koncert klasične muzike u At Mejdanu

Besplatan koncert klasične muzike, održan u At Mejdanu, bio je poseban događaj u okviru “Bašćaršijskih noći”. Violonistica Natalija Todorović i pijanista Vlado Danić izveli su program sastavljen od djela klasičnih kompozitora, što je privuklo pažnju i ljubitelja muzike i slučajnih prolaznika. Koncert je održan na otvorenom, u autentičnom ambijentu Starog Grada, što je dodatno doprinijelo intimnoj atmosferi i uživanju publike u kvalitetnoj muzici.

## Održan koncert grupe Zoster pred prepunom ulicom Zelenih beretki

Grupa Zoster održala je nezaboravan koncert u prepunoj ulici Zelenih beretki, gdje su posjetitelji imali priliku uživati u njihovim najpoznatijim hitovima. Koncert je bio jedan od najposjećenijih događaja ovogodišnjih “Bašćaršijskih noći”. Publika je s entuzijazmom reagovala na pjesme sa svih pet albuma grupe, a posebna pažnja bila je posvećena njihovom posljednjem studijskom albumu “Najgori”, koji je bio vrlo dobro prihvaćen. Predgrupa na koncertu bila je Individua, alt punk bend iz Sarajeva, koji je svojim energičnim nastupom zagrijao publiku.

## Na Trgu Prve brigade policije Amira Medunjanin zatvorila Bašćaršijske noći

Spektakularan koncert Amire Medunjanin, održan na Trgu Prve brigade policije, bio je vrhunac ovogodišnjih “Bašćaršijskih noći”. Ova poznata interpretatorka sevdaha, uz pratnju svog ansambla, priredila je nezaboravan nastup koji je privukao veliki broj građana i turista. Zvuci sevdaha, u kombinaciji s autentičnim ambijentom Starog Grada,

stvorili su jedinstvenu atmosferu koja je oduševila prisutne. Načelnik Općine Stari Grad, Irfan Čengić, izrazio je zadovoljstvo uspjehom festivala i najavio nastavak kulturnih aktivnosti u općini tokom narednih mjeseci.



Koncert klasične muzike održan na At Mejdanu

## Press konferencija u Saburinoj kući



Press konferencija povodom zatvaranja festivala održana je u Saburinoj kući, gdje su se okupili organizatori i umjetnici kako bi najavili završni koncert Amire Medunjanin na Trgu Prve brigade policije. Načelnik Općine Stari Grad, Irfan Čengić, naglasio je važnost kulturnih programa za jačanje turističke ponude Sarajeva i općine. “Naša općina, koja živi od ugostiteljstva i turizma, bilježi rekordne brojeve posjetitelja ove godine. Stalo nam je da tokom cijele godine nudimo manifestacije na našim ulicama, trgovima i parkovima”, izjavio je načelnik Čengić



Koncert grupe Zoster u ulici Zelenih beretki



Prepun Trg Prve brigade policije na koncertu Amire Medunjanin

## Protokol

# Načelnik Čengić na Nacionalnoj konvenciji Demokratske stranke u Čikagu

Općinski načelnik Irfan Čengić prisustvovao je Demokratskoj nacionalnoj konvenciji u Čikagu. Na ovoj konvenciji, Kamala Harris je zvanično prihvatila nominaciju Demokratske stranke za predsjednicu Sjedinjenih Američkih Država. "Sjedinjene Američke Države su najvažniji strateški partner Bosne i Her-

cegovine, i ovakvi događaji pružaju priliku za lobiranje u interesu naše zemlje. Američki izbori značajno oblikuju globalnu politiku, ostatku svijeta a posebno kod nas, vjerujem da će i nakon izbora SAD ostati država koja je posvećena stabilnosti i napretku BiH", istakao je načelnik Čengić.



# Svečani bajramski prijem kod reisa Kavazovića

Povodom Kurban Bajrama, delegacija Općine Stari Grad, predvođena općinskim načelnikom Irfanom Čengićem bila je gost na svečanom prijemu, čiji je domaćin bio reisu-lulema Islamske zajednice u Bosni i Hercegovini Husein ef. Kavazović. Prijem je održan u Rijasetu Islamske zajednice u BiH na Kovačima. Reis Kavazović je istakao važnost vjerskih blagdana kao prilike za međuvjersko zblizavanje i razmjenu emocija ljubavi i topline među ljudima. Prijemu su prisustvovali predstavnici nekoliko nivoa vlasti, međunarodnih organizacija i diplomatskog kora, kao i brojni predstavnici javnog i kulturnog života u BiH.



*Reis Kavazović istakao važnost vjerskih blagdana*

# Podrška za projekat „Bosna i Palestina: Most razumijevanja i solidarnosti“

Ugovor o sufinansiranju projekta pod nazivom „Bosna i Palestina: Most razumijevanja i solidarnosti“, potpisali su načelnik Općine Stari Grad Sarajevo, Irfan Čengić, i predsjednik Udruženja Palestinska zajednica u BiH, Majed Maarouf, u prisustvu vijećnika Općinskog vijeća Vedada Deljkovića, čija je ovo bila inicijativa. Ovaj projekt ima za cilj unaprijediti dijalog i solidarnost između Bosne i Palestine kroz promociju palestinske kulture i historije u lokalnoj zajednici. Potpisivanju ugovora prisustvovao je i ambasador Države Palestina u Bosni i Hercegovini, Nj.E. Rezeq N.M. Namoor, koji je izrazio zadovoljstvo zbog uspostavljanja ove saradnje.

“Ranije je Općinsko vijeće na inicijativu vijećnika Vedada Deljkovića, izglasalo da dodijeli prostor na Baščaršiji ovoj organizaciji. Sve što smo obećali ambasadoru do sada smo ispunili, a nadam se da nećemo ostati usamljeni u ovom projektu i da će i



*Svečano potpisivanje upriličeno u Ambasadi Države Palestine u BiH*

drugi podržati ovaj projekt”, naglasio je načelnik Čengić. Vijećnik Deljković izrazio je zahvalnost za realizaciju ove inicijative te naglasio da će Stari Grad nastavljati podržavati narod Palestine kroz projekte koji predstavljaju most između naših kultura i naroda.



*Vijećnik Deljković podnosi inicijativu*

# Čarolija 30. Sarajevo Film Festivala nije zaobišla ni Stari Grad

**Općina Stari Grad tradicionalno pružila veliku podršku • Jubilarno 30. izdanje organizovano na visokom nivou**  
**• Ljetno kino Stari Grad opet najatraktivnija lokacija • Rekordna posjećenost**

**S**arajevo Film Festival je jedan od najvećih i najznačajnijih filmskih festivala u Evropi. Osnovan je u Sarajevu 1995. godine, tokom opsade Sarajeva, i svake godine dovodi brojne međunarodne i domaće poznate ličnosti u Sarajevo, a posebno u našu općinu Stari Grad. Ove godine održano je jubilarno 30. izdanje, a uz nezaobilaznu podršku Općine Stari Grad, u njegovim sadržajima uživale su desetine hiljada posjetilaca iz zemlje i čitavog svijeta.

Kako često ističu iz Direkcije Sarajevo Film Festivala, podrška Općine Stari Grad Sarajevo od izuzetne je važnosti za održavanje SFF-a, s obzirom na to da se najveći dio Festivala odvija na području Starog Grada. Ova saradnja potvrđuje posvećenost Općine kulturnim manifestacijama koje značajno doprinose ekonomskom i društvenom razvoju.

**Načelnik Čengić na crvenom tepihu: „Ponosan sam što kao načelnik imam priliku podržati Sarajevo Film Festival“**

Jubilarno 30. izdanje Sarajevo Film Festivala otvorila je 16. avgusta svjetska premijera novog filma bosanskohercegovačkog reditelja i oskarovca Danisa Tanovića "Nakon ljeta". Premijera i svečana ceremonija otvaranja SFF-a održana je u Narodnom pozorištu, a prisustvovao joj je i općinski načelnik Irfan Čengić. „Ponosan sam što kao načelnik imam priliku podržati Sarajevo Film Festival, izuzetan događaj koji doprinosi međunarodnom ugledu našeg grada i jačanju naše kulturne baštine. SFF je istinski simbol svega onoga što Sarajevo jeste – grad kulture, umjetnosti i



*Ljetno kino Stari Grad prepuno ljubitelja filma*

raznolikosti. Sarajevo Film Festival je 30. godinu sinonim za kulturnu i umjetničku živost našeg grada. Kao jedan od najznačajnijih filmskih festivala u regiji, SFF privlači ne samo vrhunske umjetnike i filmaše, već i brojne posjetitelje iz cijelog svijeta, čime se Sarajevo pozicionira kao središte filmske umjetnosti i kulturnog turizma. Ovaj festival ne samo da obogaćuje našu umjetničku scenu, već i značajno doprinosi razvoju turizma, promovirajući Sarajevo kao grad otvoren za kulturu, inovaciju i kreativnost“, poručio je načelnik Čengić.

Ovogodišnje festivalsko izdanje donijelo je veliki broj filmova, u okviru Takmičarskog programa prikazano je osam dugometražnih igranih filmova, 17 dugometražnih dokumentarnih filmova, pet kratkih igranih, devet kratkih dokumentarnih filmova i 11 studentskih filmo-

va. Srce Sarajeva za najbolji film osvojio je rumunski film „Tri kilometra do kraja svijeta“. Kao i svih prethodnih godina, crvenim tepihom prohodale su neke od najpoznatijih ličnosti iz svijeta filma, umjetnosti, muzike i sporta.

**Ljetno kino Stari Grad opet najatraktivnija lokacija**

Zahvaljujući dugogodišnjoj i odličnoj saradnji Općine Stari Grad i Direkcije Sarajevo Film Festivala i ove godine se realizovalo Ljetno kino Stari Grad na Trgu Prve brigade policije. Prema mišljenju brojnih ljubitelja gledanja filmova na otvorenom, opet je bilo riječ o najatraktivnijoj festivalskoj lokaciji u Sarajevu gdje je prikazano osam filmskih izdanja.



*Direktor Marjanović i načelnik Čengić: Odlična saradnja SFF-a i Općine*



*Načelnik Čengić i predsjedavajući Škaljić na otvorenju 30.SFF-a*

